

太

函

集

太函集卷之九十六

新都汪道昆伯玉著

書牘二十七首

劉大中丞

承咨查數事一一據實條答具在公移獨踐更事宜  
有關兩省大計竊恐公移未盡故敢不避譙責謹以  
裏言申之閩中自調浙兵以來三見蕩平屢經克捷  
莫非其力而浙兵破巢之所俘獲計功之所資予數  
亦不貲故閩地倚賴於浙兵浙兵樂趨於閩地情事  
之必至者也但一人入伍則必授一人之糧一日在

營則必給一日之食卽境內用兵亦不容少況越境乎先年募兵於浙文移未始相聞浙人皆聞大寇在閩不啻蠅集蟻聚甚者不由本院本鎮率多私募私投彼旣擁衆而來驅之出境恐激生變故譚公不得已爲之收兵入伍縛其首事者重繩之當是時寇患方亟正仰給於外援軍儲所供可取辦於內帑故譚公猶可調停隱忍然已非其本心也於是定爲分班移咨請發正欲假借公法禁止私圖非惟在浙得弭戢於方來而在閩亦懲艾於旣往矣其後趙公與譚公意見未協文法頗繁後之募兵或咨或否又一變

也及某受事之始僅餘帑銀一萬七千而未給當年功級及該季月糧不啻八萬某朝不謀夕隸勞萬端幸而仰藉寵靈境內無警卽可以省一日之食一人之糧於某誠幸矣繼而浙人得翁開府於閩有若二天何者謂翁視天下爲一家視不肖爲同氣也某恪守成議凡事必稟命而後行亦恐舊任義烏或有藉口子民託名報效如譚公舊時所苦者誠欲申明紀法以寢其謀耳承翁力排衆議發兵如期功被八閩非直一人之私感也近以義烏縣徐知縣妄報放班兵數十無一歸厯翁致疑責閩查發夫放班舊例出

境則有犒賞在省院道親臨教場給之在路則有行糧沿途府縣查照長單給之統押則屬偏裨過關則報期日有司卷牒在在可查若既出境而復私留各兵何所給餉如果境內無警驟畱下班官兵某脅亂無知容或至此而額外糧餉何所自來此可坐照而知也或謂出此入彼轉投別營則閩中三路官兵俱由撫鎮簡閱辨記年貌印給腰牌其餘各司道各將官一人不得私用似無轉投之所或謂出赴他省則江西直隸俱不用兵該縣政拙催科以此藉口抑或市人蠱惑未及致詳其言不足收也至若班兵更番

務照成籍點發律以文法允宜遵行揆諸人情似其不便何者浙兵赴戍率以募利而來得利而歸者則保身之念重而改他圖不得利而歸者則趨事之氣衰而復本業兼以家人生產各有緩急死亡疾病不無參差必順其情之所樂從然後可以鼓其氣而使有勇自昔浙兵在省亦莫不然此固情之所不可違法之所不可強者也如必人人定籍歲歲更番彼之所利者幾何乃束身而編遠戍惡能強以必從哉今之計但當禁踰額之兵不當問補伍之數翁以爲何如各兵下班必赴軍門查發原籍似亦便事但自江

山至省自省至金華肅伍而行非二十餘日不可一切行糧夫船之費歲計頗多況旣經二旬又當議月糧矣如自閩給閩方詘乏似難於常額之外加此供需如自浙給則以境外之役而費境內之財在翁一視同仁無分彼此在閩則重累隣國非所安心惟翁所裁耳閩中近練主兵三營漸有成效今所取發已減浙兵三千自後則主兵以漸而增浙兵以漸而減則應募者日少操兵者日銷不假科條不煩文法而兵端弭矣翁方抱隱憂蚤遇亂略凡有血氣孰不知之況新安與婺爲隣婺之不馴隣之震也某安敢故

爲蒙蔽徼旦夕之利而忘父母之邦乎翁當有以亮其心矣向以陸兵蹈海致多折傷屢復請募二營以補北路之守緣咨文未達應募已齊閩中未接回咨乃復移文催促武夫不知紀法遂由間道入閩卽其趨事之義於閩則忠律以方命之愆於浙則悖然非武夫之罪罪皆不肖之由誠願負荆待罪司馬翁能追簿責否乎志將自明詞涉過激惟翁蓋之如天容之如地無任瞻仰之至不盡欲言

### 閩中上政府

福寧亡命殘虜一一搜捕無遺事涉細微不敢復瀆



聖聽舟師追擊吳平累敗之於廣海近據解報功級  
謹以狀聞但事在彼中須從彼省勘報夫吳平自廣  
入閩又復自閩奔廣據其形迹詎非爲壑於隣顧閩  
廣唇齒之邦于隣之震境內之憂也初閩將有事於  
平平爲積威所刼可傳檄而走耳竊計境外無脩驅  
之出境彼且迴翔於漳潮之交畫地而守則老師越  
境而攻則絕餉非計之得也故當時陽許其撫陰伐  
其謀直欲以智取其渠魁而力下其餘黨可畢事矣  
不虞境外機泄平遂避兵而逃卒殲其半驅之南而  
尾擊之非閩中本謀也傳聞此孽猶在高廉之滸茲

已聚兵備之使有可乘固當不遺餘力詎敢自分彼此有懷縷縷未敢遽陳伏惟台慈照原無任悚息不具

又

比年閩寇陸梁倏滅倏起大抵皆盤據采阻以老我師我師裹糧入山其勢不能持久相持不下復託招撫以羈縻之然則彼之敢於陸梁恃此之習於招撫也龍頭寨賊蓋楊一蘇阿普之道由萬而千由千而百始則負固而抗敵繼則獻俘而求招皆其故智也竊計失今不治漫無所懲又將墮賊之術中而遺患

於意外矣故程督將吏寧曠日持久必拔其巢而悉  
平之仰藉威靈已獲全勝自此而寒反側之膽破沿  
襲之奸庶幾乎得息肩矣官兵暴露十旬勞苦萬狀  
候查明功級另爲乞恩吳平因欄水陸兵齊避居南  
灣流劫廣東佯爲築室而居陰欲治舟而遁廣東兵  
船尚無消息不日當另具疏以聞伏惟台慈照臨無  
任瞻仰

大司馬楊公

閩中祇承 廟略春汛底寧此時有事吳平全師舉  
矣水陸旣集風汎將回我兵之氣方新彼醜之居未

定此正可擊之時也羽書交馳使者相望廣東俞總  
兵已往南贛湯叅將尚在省城閩人坐食待期居然  
策應無據萬一賊乘風便捩舵南奔在廣旣不能肉  
其前在閩輒難以掎其後簡書可畏謂在事者何謀  
者謂賊陽築室而陰修船蓋將乘汎而遁俟北風起  
其勢不能緩師閩人各持二月糧計必窮追以責成  
效藉令廣兵如期而至相與掎角而一鼓殲之此上  
願也不然則閩人可爲者不敢不自盡其不可爲者  
亦無如之何矣極知南顧方切屬使者報命謹以裏  
言申之伏惟台慈照臨無任瞻仰

吳大中丞

比來有事防禦久曠起居顧心邇跡遐知翁或不以此苛禮爲讓吳平情狀疆吏必以相聞其間倚角機宜惜內外虛實不相符合否則爲醢久矣近聞廣中又復沉其舟獲三四百級未知果否汛期過半海上寂然倘藉寵靈彼醜不敢西鄉又可卜旦夕之安耳某入閩不啻三稔塊然一身老親憚於畏塗其於家食迄今未能迎養有懷明發謂王事何知翁亦有陟岵之思故敢以裏言告

又

今年汛期遲甚登犯者不啻五百人幸皆一鼓滅之  
翁之寵靈盛矣獨龍頭寨殘孽負固不馴積雨阻兵  
尚未畢事茲俟稍霽不日可平吳海之來翁已見之  
於早閩之失策寔惟厥初其後則境外無兵第恐驅  
而出柙爲廣中患乃若以隣國爲壑則非本心卒之  
舟師未收全功則廣中以虛聲爲應而徵發皆未至  
故耳往承文告義正詞嚴竊恐或得於傳聞客未諒  
當事者之心也少暇當具顛末以聞茲不贅

又

札中披示密語知翁將有事於三巢三巢負固久矣

往陽明先生在事未嘗一日忘之當先生時中外尚  
多擁閥乃今聖君賢相操廟筭於中猛士謀臣張  
國威於外蓋千載一時也有非常之人則必有非常  
之事況得其時者哉故凡一才一藝之士亦宜乘時  
感奮以荅昇平翁獨物色閩將而推轂之閩將敢不  
用命知翁智周千慮謀出萬全不肖何知何敢緩頰  
顧閩於粵爲隣國不肖於戚將軍爲同仇屬有吳平  
之役日夕與戚將軍討諸便宜敢不自盡其愚以效  
輿人之誦惟高明財擇焉一日議餉天居常而視三  
十萬亦云不貲竊計巢賊三萬有奇三部分兵亦必

各具三萬而後可以議戰守假令備師縮餉大約非六七萬不可今茲議留之數僅足三四月糧耳戰具行糧功賞不與焉縱使有征無戰一鼓殲之如期而往如期而旋計日授糧猶若不給彼或據險死守未可急攻盡氣狂奔未可邀擊師老財匱其謂之何況三省俱屬空虛閩廣尤爲詘乏卽有不繼智者不能爲謀願以今數三倍之乃可舉事如使費半而功倍猶不失爲公帑也二曰議兵巢賊盤據百年擁衆三萬聞先後當事者屢欲興師彼亦慮深而謀豫矣夫以一夫當關之險數萬守之此非節制之兵誠難進



取乃今三部節制果孰爲優大抵俞將軍之謀畧石  
將軍之威名固皆一時之選顧其所部非降卒則撫  
民或土兵耳此輩烏合不馴陸梁難制竊恐二將軍  
或未能責其一一用命又惡能制敵之死命乎哉所  
云節制之兵戚將軍是已然戍閩之衆不過萬人方  
剿吳平尚未畢事幸而事畢彼將奔命不遑但閩事  
初定內而彈壓外而防禦不可一日去兵倘然以其  
節制足賴使得一當賊鋒則必以三萬往雖盡發閩  
戍猶不足以當什之三閩戍旣空設有一夫不逞戚  
將軍內顧且不暇惡能舍已田而芸人之田故必以

浙兵戍閩者留閩一年不必更代亟請發銀數萬屬  
戚將軍赴浙召募先後新舊下班之衆一如赴閩之  
初則三萬之師庶幾可集然浙江軍門方有厲禁凡  
將士戍閩者一切以法繩之不少貸願請 明旨令  
得同浙江軍門徵發他日亦同浙江軍門論功然後  
乃無沮格耳三日議責成俞將軍宿昔名將習地利  
盡虜情乃今贊帷幄之議者必俞將軍也惜其獨有  
深沉之畫苦無素練之兵他時將屬大計知翁必不  
以俞易戚矣夫耕問奴織問婢必先盡其慮而後可  
責其功俟吳平事寧願相期爲會面盡機宜執其先

資之言彼當思所以成其信矣不然所用非所謀所謀非所用猶慮其有遺策四曰議事任夫事關三省兵分三部必翁以總督蒞之則三者定於一矣然三部必各設監軍憲臣一人以司監督必得有才識習兵事者充之重其事權使得行其所部於計誠便知翁已有所屬願示之

趙督府

閩中仰藉寵靈春汛稍獲尺寸之效旣又以其餘力搗山寇之負固者拔之不謂吳平自海南來舳艫蔽海舟師以寡不敵遂敗績於玄鍾乃今大興水陸之

師業已納諸罟獲將來可制其死命但因獸猶闕未  
可急攻廣中方聞募兵無及於事今悉全閩之財力  
與彼相持秋汎已深海防尤急司計者無所措手閩  
中吏士聞有濟邊之詔皆將有望於袁州某不能爲  
謀敢不以請誠知發棠爲不可復其如目前之計何  
往者會計全閩軍儲賴翁獨持大議逆定成筭某越  
在疎邈人微言輕惟翁終始忠誠視海隅猶在几席  
倘然得請秋毫皆不貲也浙兵踐更之議日益更難  
乃今而知翁之所以爲閩者無所不至有懷甌繚未  
敢具陳塞外秋高胡馬不敢南向禁中頗牧翁實以

之柱石之軀願順時加愛不盡

陳侍御

翁在行部未敢亟問起居每信使自南海來稍稍聞  
無恙幸甚瓜期將及畫錦有期計得負弩郊迎以慰  
饑渴今年島夷入犯不越宿而悉殲之寨賊盤據龍  
巖攻之三月乃拔境內庶幾無大故矣不謂吳平連  
引海寇憑陵廣艦侵軼閩疆乃者犯舟師執武弁意  
氣橫甚閩中不憚徵發舉全力以應之獨廣潮無兵  
扼其下流終不足以制其死命已屬監司待命憲府  
惟翁肅將 明命得從便宜乞遣湯參將盡舉所部

兵船刻期夾剿則或掎或角鹿死其手必矣否則師老財費謂閩中孤注何凡百具在公移伏惟照察臨書無任懇切不盡欲言

又

初大將軍以進止爲請不肖竊謂兵貴神速必乘其未定而擊之適翁移檄諸部與此議同諸將奉檄而行喜動顏色謀者屢報十一日賊船紛紛下海南竊計賊將遁矣不謂天褫其魄則唯虜掠海南丁壯而歸十五日傅子以舟師圍之十六日尚以小舟出戰我衆沉彼數艇賊敗復歸灣中灣中山形如玦獨缺

兩端今以舟師環守其口而困之待其力詘而後可  
議進取恐與龍頭寨事大略相同我兵雖可以徼近  
功然亦已握勝筭矣灣中人多糧少衆心已離曠日  
持久或有內變亦未可知也十八日大將軍發漳州  
赴詔安次日海道亦往俟大將軍至彼始有定形有  
定計當再發使以聞

林侍御

昔稱舜功二十而除凶居其四焉今之元凶總斯四  
者猶不足以當其什一明公不避強禦獨以惠文彈  
治之天子聖明卽寘之法持國是儆官邪發逋逃

之姦雪神人之憤此之爲功煌煌乎盛矣不肖幸得從事卽爲執鞭不辭焉使問三至辱不遐遺幸甚幸甚獨楊簿將命未達計必猶在行李間島夷乘汎復來而南北遍登者不下五百然皆不旋踵而破幸得保境內完汎已踰期今且息肩矣軍儲之議業已條上便宜尚未報可或欲就近而請給於籍入之數不識可乎使者出關謹授繻以往對使咕咕自喜願以不肖之身從之薰風惟時民愜悉解願言茂對以介寵綏不具

又



閩中不憚徵發悉全省之財力以從 簡書經費既  
單無所仰給茲具䟽上請將有覲於袁州誠願得翁  
一言閩事濟矣夫以逆類封殖積至二百萬緡非翁  
以惠文發之卽殷殷露積亡誰何者翁爲 國家發  
此巨盜 國家卽出數萬爲翁賑父母之邦奚不可  
哉卽翁有言固不待言之畢也䟽藁附呈用徼鴻惠  
伏惟照察不盡願言

俞帥府

頃挾感憤之氣語多不馴顧辱長者之言赧然汗下  
平賊破壘而出其意未嘗不在南閩人欲爲尾生廣

師久而不至虎兇出押譚事機何如海南不能  
前雖有捷者亦難以議其後此不待智者而知也  
願被髮纓冠以救同室幸而畢事使閩人藉此以  
刑書爲庸多矣高明亮之

譚大中丞

邇來誅不肖而進羣賢庶幾乎堯舜之世此君子道  
長之會日可見之行矣我翁卽吉伊邇固當移孝於  
忠于時烽入三吳兵連百粵 廟堂側席已久敬告  
司僕願脂車待之父子出境之師竟未底績此則强  
弩之末固難責其遠功而彼中徵發失期遂使功虧

一簣惜也今年春汎較遲始謂可幸無事既而永寧有警不踰旦夕而殲之既而福寧之警四至李叅將以孤軍而左右顧不踰旬日而悉殲之李子奉翁之教以周旋卓然自立志不在小其諸戰績大槩具疏藁中汎已踰期海上之事畢矣獨蘇阿普餘黨據龍頭寨僅三四百人負固高居難以力取茲檄都司王如龍將重兵往絕其糧道四面圍之屬積雨不能進兵俟少晴乃進倘然奏績山海暫得息肩則境內之福也前上軍餉便宜尚未報可往大將軍受翁方略業已於閩外制之此必翁所樂聞故敢以告

又

酒人之器不過斗筲主者謬以一石投之蓋能盡者  
什二三徑醉矣於是司正法其罵坐斥之兩楹之間  
由此而飲軟自如其流無禍未必非酒人福也使  
者自西來知蜀本無事翁將不能爲蜀淹不肖旣受  
人言亦將不能爲閩淹矣卽雲泥由此始豈不各適  
其適乎哉召募工伎則大將軍綱紀之其詳具在公  
移不遑覲縷邇聞三巢之師敗績二源之役愆期  
大將軍日望翁來與東南赤子更始卽西人繫翁  
方急馬首其將東乎不肖得弛負擔還於初服幸而  
有喙三

尺他日當爲 聖天子歌頌太平巖棲川觀聊以終  
老翁昔所云清福庶幾近之翁其謂我何使者謁行  
揮汗陳布浣溪無恙願爲遊人懸一榻焉

陳直指

海上之役傅子欲出萬全必水陸陳師坐困三月而  
後可以畢事大將軍則欲乘銳急擊毋爲老師費財  
不肖亦以海島風波難與持久假之三月賊謀愈工  
萬一諸酋操輕舟犯風濤僅以身免亦難爲備卒使  
吞舟漏網又將何辭況兵貴先人未聞遲之功也遂  
力贊大將軍議俟舟筏俱足必在進兵無疑適得鄧

同知報云吳平已縛陳晉卿及王毫詣傳都司所此  
中猶責吳平面縛欵塞始與處分即使平來則大事  
不日定矣知翁南顧方切輒以狀聞

又

不肖初接驛書人以告母母謂不肖孺子何快快邪  
當孺子初入戎行危若朝露卽得歸骸牖下不啻餘  
生其後席 宗社之靈始有今日諫議君則又推轂  
孺子使得去危而卽安孺子行矣不肖悚然謝曰兒  
奉父母之教無敢詭遇以趣時受事以來自分不免  
久矣今茲之事不待驛書至而後知之何快快也母

曰固也面赤云何不肖因攬鏡而重目慙非敢以失  
得嬰心而猶不能不爲毀譽失色則不肖之過也旣  
則以明良在上俊乂畢登卽增損如不肖者百餘  
曹何爲輕重乃今名山大澤窅矣無人誠得操杖屨  
於其間庶幾乎疑似之迹不爲不幸昔人所謂廊廟  
之上不可有山林之下不可無不肖或其人也於是  
謀諸妻孥日治巖棲川游之具盖由由然意得矣大  
將軍見過往往以此侘之大將軍猶懷妬心不肯相  
下顧鴈鷗鴻鵠各從其志耳大將軍其謂不肖何使  
人三往已三上書計次第得達承翁溫溫德教將以

材官露盟讀之悲喜交至喜則攘臂悲則沾襟無亦  
以自信之心獲明知已之遇莫報故也閩廣之事  
廟筭在焉誠得馮婦前驅並責爲右虎易與耳彼從  
人後而攫餘肉者胡爲哉雲屏翁始入境不肖未敢  
以不祥之語告之然匿而不聞嫌於自諱願翁善爲  
道意幸也路車北發當使人申候於樵川不具論

又

聞報入告母氏往述母氏之言以告翁昨蒼頭自山  
中來家大夫方以釋負爲幸二弟跳梁無狀其喜如  
狂寡妻著布衣將從孟光後矣岑君方有大造於不



肖舉室且以爲恩何論當否翁愛人若加諸膝故惓  
惓於不肖三致意焉即使冥頑不靈亦將俎豆之丹  
府耳聞十日得代恨不能以不肖之驅送之願行徐  
徐毋觸煩暑是日大將軍方有登樓之約使者適來  
吾儕意氣相期當在形骸之外卽不能百斗又惡敢  
以豪飲讓他人邪䟽揭二藁業已先呈計今達矣樵  
川有嗣布者茲不具論

又

相依省會若景依形朝見則朝夕見則夕何知契闊  
及三山發軔猶在部中日相加遺無煩置驛遠猶邇

也況非遠乎茲且出疆信宿千里之外心雖嚮往謂  
道路何嗟乎公旣長驅不肖亦從此逝矣夫傾蓋如  
故至今誦之不肖幸依繡斧之光非直傾蓋已也明  
經同業通籍同朝將事同時蒞官同地兼之曠日持  
久亦越二年卽不敢自附爲同心蓋亦庶幾乎莫逆  
矣至於慷慨自許憤激不平其性往往相近不肖柰  
何從海內之士得一當公乃今行止不俱出處互異  
有懷耿耿不肖爲石人邪方今 天子聖明老成具  
在正公等大行之會畢力報 主之秋也鄧林枯株  
昆山鼠腊不肖是已幸毋以不肖故而憚從事之心

海內名山待公轍跡久矣武夷君不能執地主禮願  
姑舍之彼其俯視武夷不啻培塿無足多也出樵川  
卽爲境外其適可知下車里門當在三五之夕誠願  
以滄海爲觴神山爲豆爲太夫人稱壽何如大將軍  
爲海山圖不肖爲贈別圖將私屬短章以供姍笑茲  
未遑也俟卒業專使致之不具

戚都督

言無不納公其善用言哉假令用公之言者如之百  
粵不足平也司馬上仙遊功狀金幣復出 尚方公  
身經大戰者三卻島夷萬衆視平海之後其難倍之

今茲議功曾不能以什一較之淮浙之賞不啻徑庭  
亦知司馬非薄公蓋厚望公於方來也不佞因人成  
事猥蒙不貲有覲多矣當公與不佞急趣興化夜望  
仙遊白氣亘天未遑枕戈徒跣相語此何時也五旬  
有六日仙遊始得解圍使在北邊羽檄日至卽上  
無所督過論者四面起矣凡此莫非主德敢望賞  
邪備在同心遂覲縷至此不具論

又

得楊虞翁書南粵之事一意專倚戚帥豈容中止公  
卽欲弛於負擔今或未能而承差又云陳公所上書

從錢糧不從總督恐又不能無掣肘也不佞以覲見  
放諸老猶不以爲罪而唾之茲將出境誓三緘吾口  
示不可復用顧閩廣之事當路猶在多岐之間不佞  
欲爲公一言恐罪廢之人妄談時政得罪且重俟次  
崇安然後決筴軍政類考錄畢卽馳急足追來立待  
立待

又

黃田以北憂喜則時有之大約憂者什三喜者什七  
釋重負而息肩故喜遠石交而離索故憂要之身不  
失謀故憂不勝喜自武夷而下憂喜乃均蓋聞公之

涉世日以艱不佞之去公日以遠也頃公所上條陳  
䟽廟議將決筴從之不佞擬上便宜八事將爲公  
作同聲繼聞戎事更新不敢復開口矣屬晏秋元還  
省附此布之丈夫萬里爲鄰何論潛見願公堅忍保  
我士民不具

又

承差盧灼劉國翔至自闕下逆我江干首問公所  
論事可否云何則云廟議許可矣旣而知陳文治  
附有揭帖亟欲見之遂呼中軍吳生叩私發可否狀  
吳言無害不佞竊以爲難旣而曰所言公公則可發

所言私公無私使者亦無私於是冒古人之戒發而  
窺之知諸老信之任之委曲成之茲百粵八閩之德  
也內外封識如故各另加封罪在自專無繇肉袒然  
亦恃公之肝膽相照休戚相關耳高明察之

又

陳世潮去後五日復得清漳書知明公孤忠不與之  
狀令人扼腕第 廟議果有成筭其於轉移不難明  
公待之耳肩重者既釋負翩翩然以輕身而游故鄉  
每從諸丈人行爲高會一飲可盡八斗客或以酒德  
規不佞毋爲放飲人將謂假此以沃熱中不佞領之

飲復如故內省吾心則皆永釋安得熱邪家大夫進  
之庭則又以失養生之遺爲戒不佞唯唯然尚未斷  
之也海山公歸省且久北上何時公在二境之交迄  
今得相聞否聞卽見示幸甚

又

頃因程憲副入賀附之書疏計獻歲始得投邊歲暮  
邊警無聞部中或可稅甲矣江南冬煖草木先春明  
年不無灾眚山人爲耕鑿計心竊竊然憂之幸而有  
年則一日不易三公也聞漳州告急懼將不支夫以  
騎刼代安平何以決勝千里如天幸閩廣必將復用



廉頗當事者固當爲蒼生握勝耳

王元美

沈生以六月至居數日輒聞人言卽戚將軍發使入  
吳僕受書不報則誠褊心人也澤雉自得飲啄其適  
可知二使者自門下來被我文采傅我皮毛神益王  
矣亟欲汎舟五湖從公爲十日飲屬妻孥俱在疾疾  
猶不能忘於懷旣而有事干擷綢繆不暇亦猶凡鳥  
始脫繲錠終不免於拘攣視彼翼飛垂天相去不啻  
千萬明春將挾顧季狂氏從公大海之濱使得一當  
門下酒徒卽鋪糟而朽不憾也往墨卿數十輩相從

三十餘年會閩省災悉爲祝融掠去猥辱微令謹遣  
四人紹介其間尋當結廬黃山躬自經紀其事異日  
者上之記室庶幾有所取材今未能也山中稽使人  
且久簡畧百端公故知我貧或寬其罰幸甚幸甚

胡都閩

歸人出境足下猶然相從掩泣路隅幾至哽咽卽歸  
人有浩然之志寧能作石人邪平生汲汲將爲五嶽  
之遊比入山跬步不能出門戶大都生人物役卽出  
處有差乃若玄同道遙非有道者不能耳閩廣分部  
而治固三軍投石超距之秋昔嘗以肝膽視之今不

免爲秦越矣。足下居將門最久，得人心最深。卽僭號析珪，當在蚤暮。願言安意待之，使人來乃辱重問。心竊竊然不自安。屏銘甚工，置之座右，如對顏色。附此陳謝，不盡言。

太函集卷之九十七

新都汪道昆伯玉著

書牘五十二首

塗中丞

歲云莫矣方與昆蟲墜戶以居又受命嚴君謝賓客  
斷杯酒日惟坐方丈室挾筴讀書飯罷則鼓腹而游  
游倦則據梧而瞑此山人之大較也使命遠至灑然  
攝衣拜之感懷百端別楮未能悉其一二茲不縷縷  
承示封事莫非經國遠圖計 廟議將無不從八閩  
自此定矣夫梓人運斤賤工血指其明公與不肖謂

乎文編竣工受賜無量裴姜太史獨不肖爲之序業  
有成言顧七仞臺門爲之縣簿懼其弗稱語曰身且  
隱矣焉用文之不肖亦將從此結舌耳海內紛紛幸  
明公在非惟不肖欲避當世當世又惡用不肖爲也  
杪歲不敢復稽使者越宿遂行東望扶桑如見顏色  
不具論

又

不佞有生蓁蓁然與草木同春秋耳薪者弗察冒然  
舉肥頃之多口呶呶竟以不材見放乃今退棲櫟社  
保其天年幸也顧棟撓南國獨賴明公隆之尋繩墨

易斧斤明公受境內之累多矣然且不遺故舊命使  
自千里來甚則念犬馬之年計桑蓬之日溫辭重幣  
不啻百朋即使北山有神猶將退然避舍況不佞乎  
猥念戎馬十年綈袍道敝迄今始反初服幸得承膝  
下歡至日弟先稽首天南然後稱壽堂下解衣爲綵  
錫爵爲觴殆舉宗之侈觀不世之極感也使旋虔此  
陳謝容嗣布之

姜使君

鳳阿

弟罪狀較著公議猶或優容千鈞重任一旦息肩幸  
也自非蛾眉安得妬婦其於天人何敢怨尤社稷生

民賴公在事第庶幾得爲擊壤之逸民可終老矣此  
夙心也惟公能諒之

又

行未浹旬閩事非昔矣諸將喪氣三軍解體誰能以  
交驩之言進曲途哉平智有餘安劉必勃漢高蓋早  
見之士不豫附而權分何以底績執此不變太尉殆  
將不容平乎平乎奇計安從出乎初擬條具便事以  
聞知意見不合恐無益徒瀆 聖聽耳此言惟公可  
以告不復聞他人公置之不聞可也

陳直指

今年屏居饑中臥病七月病少間幾喪內人兩人率以藥餌爲養殮其情狀可知矣舍親使人至乃辱問遺如汎彭蠡躋匡廬握衣而待函丈無事七發問霍然計太夫人就養豫章安享黃髮家君以下幸無恙承下問敢不及之頃得戚都護書亦局趣不得志時事固多禁格其若之何南中軍功一時烜赫視吾黨瞠乎其後矣明公復爲鄉國遠慮誰能居中等之不佞方有事逃禪冀就西方淹日月耳明公復語以人間事非所敢與聞使人立馬索書草草布復不盡

宋憲長



頃上計京師謬當客禮不相聞問亦越九年邇幸釋  
事出聞聞公尋以護軍至彼都人士非公之賴而誰  
賴哉屬大將軍遣材官來知戎車行且入境不佞備  
在宿昔附此私布之往不佞鎮閩大都由護軍起乃  
今罪狀彰著誠亦自知其非所幸者彌縫闕失以安  
部中則公今日事也古之善用武者必先行陳輯穆  
而後有功河曲之師雖宜子猶將敗績昔之在事區  
區獨此心耳乃今不曰輯穆而曰比周則不佞之罪  
也公方繫海內望即閩事不足以淹公緩頰猶將有  
言直爲三軍祈後福耳野人食芹而美欲獻尚方不

佞是也惟高明察之

方景武

人言諸客客轅門足下獨以翩翩見重嗟乎此足下  
緒餘耳顧孟堅附車騎而名愈顯車騎得孟堅而義  
愈高乃今若大將軍何論車騎即足下屈首書記其  
無怏怏矣乎不佞四十無聞何足爲壽足下亟稱之  
不置心竊志之聞季狂嘉則相繼出閩願足下及黃  
生壹意精進毋傷寡和陳本中壯士大將軍雅重其  
人倘有可乘寧不推轂不佞婚嫁未畢未遑五岳之  
遊捐捐然乾沒里社父老間無復嚮往時或有所論

著僅足以相隣春佐迂鼓耳債人錄在別楮因附觀之

吳明卿

歸來日望君侯嚮用詎謂復從量移古人譽蹠而非堯皆是物也君侯達者直以馬牛應之無怏怏爲也不佞會戚都護于嚴瀨乘興爲五湖游幸得習見李王二使君獨憾君侯不至八月觀潮後從海上歸屬蔣電白過家始知領高州牧高州古荒服儼然以君侯投之此殆非不佞所敢知令人拊手笑耳李王二君迭起君侯守二千石如初山澤寥寥不佞願爲諸

君子居守君侯許之乎郎君就業愈益多今復何在  
長兒歸田里舉室安之此或君侯所欲聞敬附末簡

李選部

襄使人至閩使人還兩得公書兩得聞公起居狀如  
涉鶴湖如占叢桂如登嶠然之堂計公以千里爲面  
談亦將以神遇不佞也不佞去襄五載親在未敢自  
以老稱聞公矍鑠如曩時而齒髮亦稍稍異矣退思  
疇昔寧無白駒之歎乎且聞江漢水災田租鮮入東  
菑酒稅損減有差如過高陽酒徒猶能取醉否也

殷相公

屏居山澤姓名不復入都門比年有採薪之憂一切廢禮且山澤聲跡柰何在三事間不佞非敢自疏懼恩闈人耳先師吳公即世聞此而哀可知公子匍匐京師乞名世之言以奉大事凡諸質行屬不佞具草狀之知先師者宜莫如公惡用不佞陸太常謂先師秩居四猶然得以軍功乞恩其子且詣闕上書請卹典如例幸公在事極知無不用情願力主之先師得死所矣不佞從及門之後乃復多言則公子意也

譚直指

往承下問鹽政願具列梗槩陳之方在浪游不遑持

議邇者避暑湖上屏跡杜門一得之愚可以自效極知蹇淺不足以當芻蕘要以攷之國典參之時宜揆之人心驗之事變似皆脗合鑿鑿可行願明公更定裁成日可見之從政曩聞欲爲建白具見開誠布公顧專命大臣方始首事儻然以爲可采轉告諸當事者圖之功不出已而澤先及人真盛德事明公其留意焉羈旅之人出位謀國殆有道者之羞也願明公引爲獨見無謂不佞與聞幸甚幸甚

李于鱗

僕留滯吳門茲將復過元美爲布衣十日之飲聞足

下亦在行部計當還武林四月中旬或得把臂湖山  
間耳足下主盟當代僕猶外裔惡敢辱壇坫哉顧喁  
喁內嚮業已有年旅幣無方寧復閉關距我也拙藁  
三冊謹譯而奏之乞解其椎結破其侏僂示以中國  
衣冠文物之盛不然荒服無敢至者矣先大父母墓  
銘幸得卒業已求貞石購良工待之

王敬美

僕業已約顧山人將從夜雪爲公不速之客屬有羈  
紲僕未能往而山人亦不果來市子學僊日視鹽米  
不暇則其習然哉春水生榜人或不避我公固避世

寧復避人由此而東則謁李君近矣明卿猶然不調  
且聞將乞骸骨歸吾黨翩翩誠難獨立無亦潤色太  
平諸儒咸在惡用雕蟲猶今以談之僕釋事晚矣遺  
詩鉅麗奪人目精僕無以爲酬非直病冗亦苦難耳  
惟高明照察不盡言

徐子與

不佞爲汗漫游將依公爲東道主留滯吳下未及相  
聞茲有事具區相去只尺山靈待公久矣公寧以東  
顧邪敬逆榜人相與信宿同行者顧山人季狂張太  
學幼于也由此而泝蒼雪探陽羨諸奇願從公杖屨



後公豈有意乎謹介役夫待命門下不具

又

自震澤反吳門望公至既又過元美待公婁江屬敬  
美歸而元美亦有事城府道昆西矣然猶與表黃州  
俱愆期不至亦坐此耳使者至如聞命杖屨之間往  
于鱗謂公篇詠日新優入要妙茲幸得誦筴中所載  
其喜可知道昆竊比逍遙久廢文墨它日將復從事  
願因副墨陳之今未遑也于鱗謂公六月當詣闕  
下果然乎倘留須臾俟秋風生問道若雪顧于鱗諄  
諄勸駕願公決筴遂行毋繫小子爲也聞孟嘗君當

出公門公其高戶以待喜音至將從于鱗東鄉舉酒以佐公驪道昆幸甚

又

往使者問不佞山中卒卒無以報稱德意比來病甚一切不問人間事獨與二三佛子俱妄自云游戲三昧耳頃倡聲林之役待諸長者布金眷屬吳虎臣首應義舉茲周游宰官若善知識首謁使君第力任此一大因緣成無上功德比丘祖胤亦習使君茲王肇林日爲使君頂禮他日抱送不啻徐卿此自然之應也虎臣有燕趙士氣有事名山大川所急唯使君及

于鱗元美耳于鱗白雪樓詩集鄉人欲求善梓梓之不佞所得集已付祝融願抵魏順甫卻寄一部幸甚

又

往年二三君子畢出草澤寥寥不佞獨被短褐荷長鑱冒然爲二三君子處守自惟菲薄惡能愉快勝任乎八月錢塘觀潮乘西風入歙浦忽忽歲暮復爲白岳之游春來負笈天都假館浮丘翁所賓客問謂一切弗通屬內氏病羸歸而臨視使者至與行會不佞幸哉野中不佞舊游岳時湘靈望公久矣他日抵掌膝席屈宋在焉顧不佞方避公卿貴人未能操杖屨

從公耳新詩愈益入細把翫可以窮年不佞近冀悉  
留山中未遑就正屬有事湯藥志亂心煩跂望天南  
無能致一語春風載道勉矣加餐不具

吳宗高

不佞爲方外游所至不求自通於長者毗陵信宿乃  
復東行會舍弟道化自山中來將欲受業公子所吾  
兄以經術霸海內而羣公子則又翩翩稱奇即韋氏  
明經當避三舍矣舍弟時過而後學誠自知師勞而  
罔有功倘以金篦導之則衆生皆佛性也謹爲紹介  
待命閭人惟高明照察

游少司徒

不佞雅欲東游今始汎錢塘浮震澤棲息金鰲浮玉之上會栖霞佛子至招不佞西不佞適有吳門故人  
之期不果往顧從佛子幸得聞公起居往不佞爲栖霞記般若堂曾未聞道不自意得當法眼乃亟稱之  
其事始於王仲房其人懶慢迄今猶不能舉竊計書經刊經諸役宜莫如吳人嚮者遇王元美業已商確  
其槩今計刊經之費不啻什金戚都護授之五金不佞授之一金有五有不足者願就公乞之不佞挾佛  
子過吳門出此什金以授元美即有不足輒於彼取

盈亦便事也書經姓氏必質行高明通內典者居之  
若南太宰吳公大宗伯趙公當世第一流也願借二  
公以爲此經重公幸以可否請勿謂不佞之言猶必  
趣佛子及我於吳門庶不後事華嚴經寄我一部須  
牛首子昂書刻爲佳推轂紛紛公當自此北矣倘能  
待我栖霞佛子所請以三秋爲期敬白

湛溪上人

敝郡僻在一隅居人未始聞西來義上人儼然見客  
會大川業已北遊香積不供殊爲獻笑此時卓錫且  
久逆知五濁世界悉變清涼不佞心切皈依尚阻炎

海惟西向稽首而已從如昂受四偈宛若經行而聞  
妙音屬抱病始平尚禁思索且獅子一吼百獸不鳴  
理固然耳八月西歸或得繞足而求密義不盡言

王仲房

江民璞赴江西不佞治咫尺之牘載言爲贈公善民  
璞雅以獨步傾南州誠得借公片言瑕疵皆和氏也  
諸體稍備七言歌行非公不能往已紹介民璞先談  
虔此待命立馬應之可也塲功畢耕人稍稍息肩往  
公欲過草堂此其時矣

陳達甫

拱中溽暑不侵亟欲置丈人于冷風之閣聞丈人方  
空五蘊覽四禪清涼在坐視此不啻蟻垤何問祝融  
入秋有事清齋一切屏酒肉恐坐不飽未敢以勤丈  
人八月下旬涼風起土囊之口灑塵清道願駕牛車  
而西此中亦山水一區不可無丈人之跡故也遊城  
陽山記聞丈人業已見之諸詩亦成所不者二章俟  
日青稍卻他日具陳民璞又復解官吾黨得一良友  
幸甚幸甚

又

挾筴入山業已踰月丈人有成言矣願御光風翔天



大國集 卷之九  
都也不佞蓋日望之

查八十

僕客浮丘翁所久矣不聞希音專遣與人越邑往途  
陽春載道願惠然肯來僕侍浮丘翁相待咸池之上  
耳

戚長公

長公居塞上僕入山相去不啻縣寓程使君尚未還  
縣未得長公報書傳聞司馬論海上功長公進秩自  
長公視此若固有之顧起家萬戶位極人臣亦吾黨  
之休也今歲深入黃山謝客斷酒將有事著述頃之

目青踰月竟不能構一辭時而偃臥時而漫游迄今  
始識山林樂地耳四方之志夢寐不萌蓋庶幾乎真  
隱也獨與二三弱弟商確壯游俟長公長驅大漠收  
破虜功幸得載之後車縱觀羽獵命酒行炙與部中  
樂之國士稱觴胡雛奏伎酒酣授簡髣髴子虛他日  
內之歸橐藏之故山固古昔之所夸詞人之盛節也  
明年婚嫁畢惟長公可否之山居惟烟霞木石無以  
託千里心一札八行願置懷袖

顧聖少

使者持書至竊憶足下且杖青藜訪浮丘公輒咕咕

喜發緘見書及詢使者知足下將歸吳此不佞志也  
則又喜過望足下好游幾二十年乃今得返故國凡  
有心知莫不詫其希覲矣暮春倘泛扁舟相過山家  
釀秫請與足下爲十日之飲傾歛浦爲上尊蹴天都  
爲加豆舉觴浮白相視柳榆顧非人間樂事乎元美  
子與誠願附使者脩問心事覲縷今茲未能相見幸  
爲不佞致此意不盡

沈嘉則

暮府使人來辱命之再兼爲新篇卒業不啻百朋季  
狂將過山家適歲杪不得僕馬已遂乘舟爲歸吳計

期莫春乃入新安耳足下復有初秋之約何幸如之  
近作一章附上求正王仲房相念殊切謹附相聞

歐楨伯

從兩生拜問之再如親承之今年挾虎臣入銜中尋  
病目蓋自春二月至秋七月不已一切廢詩書八月  
從諸俠少夜行游復病眩既而婦病三月迄今未平  
日以藥石爲糗糧其情狀可知已往承文事之役惟  
辱命爲兢兢足下顧督過虎臣非虎臣過獨二豎子  
當就戮耳聞足下轉官矣果能留苜蓿待故人乎輶  
中集序敬附虎臣奏之誠自知其不文徒追諾責而

已歲且更始行矣加餐不盡

陸無從

虎臣挾筴自廣陵歸不自意得琳琅千里外長歌浮  
白三山猶在吾目中屬臥疾雲門不相聞問久矣文  
學且移官去奈何奪足下良師昔人以萬里爲隣相  
去非遠知足下直從游方外耳舍親吳鴻臚築曲水  
園願紹介不佞求足下高詠曲水亦吾鄉勝事也幸  
毋金玉爾音不盡

吳鴻臚叔美

病目三月服役愆期菴橋已增入記中終覺補綴倘

不以爲脫略仍從舊藁何如况效輞川題兩端具在  
即不入記無傷也高明裁定之吳中工書者唯文壽  
承許元復周公瑕此外則唯陳方伯雨泉工大楷書  
金陵邢太史雉山工古篆兩君爲縉紳高跼亦復名  
家如力能致之東南之美盡於此矣額書私分姓氏  
似亦不必拘拘或各盡所長他日棄彼取此尤爲上  
策記須小楷詩或行書文許二君或恐遲暮公瑕猶  
能任此乃今黃淳父姬水俞仲蔚允文及壽承之子  
皆能書願擇而使之可也吳有定小篆及八分視數  
子不多讓鄉人貴遠賤近目爲東家然不可不屬此

君當一面耳病軀畏暑屏息山居東行何時不遑追  
送炎風載道願言加餐不具

金方伯

自不佞歸田衆口斷斷往往傷及麟鳳反視不佞當  
時事豈不幸哉顧楚越人言明公即主雖有巧歷莫  
得其端嗟乎彼黜麟鳳以爲不祥則梟獍祥矣明公  
得此爲善養計又何恤乎人言不佞往年會大將軍  
留吳會者八月歸來入山高臥庶幾羲黃上人顧高  
堂既壽且康場功僅足饘粥天固將佚我以老不佚  
何爲 君相方致太平吾儕幸得及於周澤勉矣彊

飯毋問四方不具

范少司馬

明公勲伐在四方高義在山海海內之士莫不延跂  
願供掃除往歲東游亟欲相從鏡湖之上屬場事未  
畢乃竟歸田至今猶喏然矣平叔至乃拜問遺後進  
卑卑奈何折節至此當世二三作者具在四明道昆  
操業無常直劍首一呖耳顧復考之以比竹合之以  
八音非所聞也明公廣厲來學意何忝忝顧方臥病  
近稿多散軼不收俟檢錄若干篇紹介沈山人就正  
平叔先發謹先布之不盡



聞公子

近聞莊簡公軼事者昔居南刑部與南禮部霍渭厓公抗疏辨論職守義正辭嚴二三故老猶能誦其大都惜未得全藁願公加意搜索增入傳中又聞豐南禺疾稍愈近日手書必佳願爲小子賺其精良則不貲之賜也周廣文已轉襄府向所索者當寄之襄陽燕翼堂文尚負諾責惶悚惶悚春和願自愛不盡言

程辰州

海陽諸大夫往往以善仕勝即不得二千石業已兼素封而軼之君侯自沅陵還猶然一布衣耳聞稅駕

且久日惟閉戶著書不佞索居而坐馳如在謦欬之側使者將命至疊疊數十百言君侯先得我心無亦臭味差近耳新著成帙不佞願得而徧讀之知君侯無讓太冲不佞願爲玄晏雅聞郎君材譽得沅碑卒業居然大雅不羣韋氏玄成今見之矣世方第靡惡能與夸毗子議出處哉同心之言無事右券願君侯與不佞勉之而已

沈問之

往君侯過不佞不佞若從千古遇之篝火夜行抵掌曾未得其什一迄今猶怏怏春風至將從君侯于桃

花流水之間顧山人方有事逍遙未脩紹介茲祝融  
用事遂使山人不急于君侯逝將以秋爲期或得一  
往禮務施報豈爲山人設哉類纂新編卓矣有裨古  
昔不佞幸得卒業忻爲執鞭不辭顧首簡諸名家猶  
挾延陵相術俯仰天地誰爲君侯知己者邪虎臣同  
事礪中無日不在君侯左右頃欲薦鱗于膳宰忽忽  
愆期比得四詩不欲刪易亦父老田間謠耳屬僕夫  
先往藉此告虔君侯亮之不具

周紀善

往不佞守襄陽願以二千石博一相國則王賢也材

如雲集猶然以王傳行乃今江漢名都賢于長沙江  
都遠甚足下豈薄襄陽邪歲四月新王始封足下  
趣行矣外折簡致諸侯王若監司部使者若中貴人  
悉附行李俟新王受社發使脩賀願爲足下申之

### 襄中宗室

當世王公貴人享有福澤則天授也要以徵應不爽  
亦必有所由來佛經以布施爲因緣或非虛語僕無  
心用世久矣頃欲以出世間法開不二門遂施地爲  
肇林大有建置顧茲願力必得王公貴人主之屬舍  
親吳虎臣周游謹以聞之殿下儻興一念爲南土主

盟則河沙功德無以踰此虎臣倜儻俠士才方程自  
邑而氣槩過之置之上坐可當高陽酒徒凡百具在  
䟽論及贈言中不具述

王元美

得京口書知公且彊起既不得請則之官無何又進  
東省東行者相望卒未能致咫尺書歲大半臥篲中  
去人羣遠矣秋至時時有東意終病懶不果行將命  
者臨門纒纒皆出肺腑古人爲親奉檄奈何獨往以  
傷親心僕疇昔之言則睹一隅耳諸君子畢出居無  
留良僕何人安敢竊富名山大澤將舍故業託精在

逃焉諸長者布金當役之半今且首事矣公爲三教  
盟主願發光明藏施摩尼珠他日紹介吳山人守淮  
惟公所命公復責僕以時事僕則安能儻然卒老招  
提願爲明時一緇衣耳承使者以序來討僕受諾責  
何辭大方之家前者卻步顧僕有成言矣柰何廢之  
十宿使者于家乃始卒事其間以出游廢日者什五  
病者什三故遲遲使者行耳往欲爲司馬公誅尚胥  
後期新詩飾我弘多未能屬和無任赧赧不腆之幣  
列在副封幸麾入置之

吳徵君

春來浪跡吳會入夏始返錢塘得十岳山人書知二  
高僧居上方經室久矣往大川頗脩戒行未悟指歸  
故不佞遣之京師就彼掩關聽法不虞二高僧以夙  
約至香積不供如昂一小沙門將欲畢先師之事亦  
已難矣儻得檀樾諸長者慨然樂施則一糲米可作  
須彌宜無難者徵君一方領袖寧亦有意乎吾郡中  
好事紛紛獨輕佛子謂不足施二高僧在容不免見  
笑于大方十岳山人亦以此爲言固吾鄉萬代瞻仰  
也客里方困乏就諸故舊募什金遺之願徵君主盟  
帥諸長者以終盛事非惟二乘之幸抑亦一方之光

也大川以脩行往期三年而後歸諸徒糊口大邦惟  
恃徵君作功德主相見伊邇俟面陳之

陸五臺

公以好佛聞十方十方佛子歸公如流水頃浪跡吳  
會將從諸佛子造公門終縛塵緣無繇歸法藏耳政  
方更始巖穴畢登越在東隅庶幾極樂公獨遊方之  
外儼然爲三界王盟即位極人臣方斯茂如也往比  
丘慧光以寫經請草草即次未及致書茲屬縉上人  
持陳中丞書謁尊公附此私布第少年從縉假館其  
人亦頗稱詩老驥悲鳴思見伯樂伯樂其謂之何第



亦將西歸言不盡意

曹太史

浪跡吳會得侍同游握手爲驩不啻昆弟乃若禮意稠疊惠此羈棲藏之中心無用口舌爲也初願先驅虞山即尋陽羨屬袁黃州有故欲去詒我先之太倉既而黃州從此歸雲間第亦移舟問武林道矣然黃州復陽羨之約計必不敢失長公之期蚤則仲夏晚則仲秋又當以杖屨從公耳向者沙門以刊經請公慨然結大歡喜緣茲張幼于部署行間業已首事敬遣沙門待命闇者惟公爲功德王庶幾不日成之彼

不敢徑謁玉陽史公孟河馬公幸公爲之紹介二公  
功德無上視此不足以當一毛但得普濟皆如公所  
施者足矣非敢爲過望也相見均當面叩不盡言

顧方伯

山人浪跡湖海惟公不弃故舊就而與之游談受益  
弘多其何以答明德觀潮後乘舸西歸歸則爲白嶽  
之游未遑致謝屬沙門還無門洞敬問起居聞襄事  
有期方在封樹願言自愛母已太勞無門洞說經則  
山人首事幸公儼然爲盟主沙門始有依歸聞彼中  
掌禁者或不能容第恐懼喜緣將爲煩惱障耳惟公

爲之護持脩羅自將退舍無上功德厥有攸歸即山人僻在一隅猶當爲諸天合掌頂禮頃多事且多病竟以諾責得過於田先生少暇即當構思毋敢爽約惟高明幸察

信山上人

公持西來赤幟高跼金陵敝郡蕞爾之區何知龍象公顧不鄙僻遠豈以獨獠亦有佛性邪大川遠遊失地主禮僕方浪跡吳越畏暑未歸翹首菩提無由聽法悵望可知矣臨湖西望無任懸情水面蓮華如覩法眼秋風卻暑計得還山不知猶得駐慈雲否不具

隱泉上人

西方之教未始行于吾鄉唯公家世總持則皆自吾鄉起然則爲吾鄉興教者非公而誰僕方有事肇林業已經始門下法孫覺忤謂公不忘故鄉即得山水一區且棄官老矣肇林去清泉五里而近足爲菟裘新都自開闢以來此蓋第一希有之事公以此老則又第一希有之人一大因緣寧有出此倘公誠有歸志明年介公眷屬迎公京師行者爲吳舍親其人多能事招提規制宜莫善于京師願遣一力引之徧觀諸招提擇其善者以爲式䟽論二冊奉覽高明照察

之

吳孝父

往從舍弟聞足下義甚高繼又聞足下蓄諸瑰琦將  
叩守藏人以覬觀美相去伊邇病懶未能得瓜洲書  
具悉足下不遺之念具經金像受賜弘多重以新詩  
照耀心目即使招提成多寶地幸哉幸哉僕將歸吳  
虔此布復不具

黃淳甫

浪跡吳會幸得結足下驩乃知名不虛立士不虛附  
高義較然著矣趣行未及面別于心終不能忘慧光

至武林知石經多出足下手河沙功德不可思議他  
日布諸十方當不在中郎下矣慧光還吳附此陳謝  
東遊諸作未暇刪定容入山次第上之

張幼于

僕羈旅人也足下遇僕一見如平生懽幸矣初與曹  
太史約自虞山赴陽羨其歸道必出吳閭告別匆匆  
私計猶得亟見屬表黃州有歸志導我先出婁江至  
則彼還雲間僕偶偶不能獨往會元羨出僕遂行皆  
非始願所及也足下爲沙門作大功德寫經勒石計  
日可成沙門從僕入吳業已三月專事此耳惟足下

加意勝果速成庶幾僕不負沙門沙門不負遺教望  
之望之疇昔長公及桐江公過我市肆自震澤返日  
苦雨未及報之謹附姓名以謝不敏願爲紹介令先  
公諸刻尚遺元美魯望銘狀二篇乘便檢寄乃可從  
事不盡言

戚長公

聞足下勞苦邊事不卹不貲之身藉宗廟社稷之  
靈無恙幸甚頃介吳生出塞上干以善因既得塞上  
書誠自知昔者過矣足下干僕莫逆將保僕以令名  
莊生有言名者實之賓也名不必毀亦不必成顧得

主何如無問賓矣要以足下所持論不啻藥師敢不  
佩服孤憤一編五殺皮二願上幕府不盡言

張大司馬

嘉則平叔逋入新安拜命之再兼之論著累牘不啻  
披雲漢而快覩之明公折節而下無能何惓惓也頃  
者 聖明在上側席求賢凡諸有名公卿畢起岩穴  
明公功德著矣顧矚然避世而壹意立言藉令位極  
人臣孰如不朽盛事所謂在此不在彼者章章矣昆  
不幸有狗馬病屏居澠中上之不能挾杖履爲采真  
之游下之不能著一家之言藏之名岳徒從諸初學



學無生耳文苑文範計已畢工衡石名家張皇當代  
使後之學者知所嚮方此百世之利也嘉則見客無  
日不誦明公屬東歸神與晨風俱往近作不足以當  
瓦缶何敢輒陳於鐘呂之間家弟松錄若干篇乃爲  
嘉則持去儻明公不廢樗散願受繩墨于大方幸甚  
幸甚

王子中

不佞少負不羈竊自比于狂簡夙聞先生主盟吾道  
從諸有口者耳視之中歲稍傳先生緒言猶之乎蓬  
心耳邇來游談方外恍然有概於中既而從大司馬

譚公御史大夫趙公聞所未聞乃知先生天下士也不佞生同時產同域曾未獲親炙于今日其將如百世之下何吾道自孔氏以來無任之者宋儒自以爲得道規規然以言行求之即彼居之不疑未免毫釐千里王文成公崛起東越倬爲吾黨少林爰及曹溪則先生在乃今排擊文成不遺餘力天下其孰能宗先生邪顧先生春秋日益高不佞髮駸駸短矣藉令先生享有壽考足以待不佞而終餘年不佞方與時浮沉去志未決河清可待人壽幾何屬御史大夫取道東歸紹介爲門往者邇勤提命蚤託神交倘惠然

之音振我空谷則亦一聲聞衆也先生許之乎

又

明公爲吾道主盟耄期弗倦倘得握衣而受提命庶幾牆面或有睹焉乃今逐逐市朝日汨聲利是猶望恒山而之郢郤步而求前者也承示問難諸書疊疊乎擴文成公所未發曹溪之擬孰謂非倫公笑僕以寒山爲文殊信乎無二文殊也已良知猶言般若格物猶言剎塵塵之不昧剎剎圓融此觀自在之深般若也來教謂良知是知非良知無是無非是非者善惡之分猶所謂規矩也必亡是非而後可以言有

味哉惟公能道之惟吾黨二三子能心悅而誦耳而  
牘中往往斥佛氏爲務內遺外其爲儒者衛道之心  
乎抑亦行其庭而未見其人乎僕嘗謂般若即良知  
行深般若即致良知信無二道此疆彼界則世儒爲  
之町畦劈破藩籬非公不可無所擇而後語此最上  
一乘義也公能俯而就之何不可哉

江民璞

今之竽者塞路乃公以古瑟鳴始奏雲門聞者傾耳  
即有三嘆不惜再彈公無遂休恐令知音怏怏耳某  
因人成事謬爲舉肥者物色之簡書畏人義無所避

端居飽食徒充不肖之軀乃若振急持危心與髮俱  
短矣來書翫縷尚多溢喜之言非至教也近讀公送  
使君詩爾雅而有直體於古何讓敬呈近體二首兼  
近作一帙供奉姍笑平生以漢魏爲口實乃今從八  
代之後而漱其下流所謂餐蘂鳴琴無論工拙惠子  
知我幸一一彈射而誘進之